

# STJÓRNARTÍÐINDI B 13 — 1974

Nr. 78.

134

1. apríl 1974.

## REGLUGERÐ

### um jöfnun flutningskostnaðar á sementi.

#### 1. gr.

Framkvæma skal jöfnun á flutningskostnaði sements, þannig að kostnaðarverð í vöruskemmu á hverri sementstegund frá hverjum innlendum framleiðanda eða innflutningsaðila verði hið sama á þeim verslunarstöðum, sem jöfnun þessi nær til.

#### 2. gr.

Jöfnun flutningskostnaðar á sementi nær til eftirtalinna verslunarstaða, sem jafnframt eru aðaltollhafnir:

Reykjavík	Neskaupstaður
Akranes	Eskifjörður
Ísafjörður	Vestmannaeyjar
Siglufjörður	Keflavík
Akureyri	Keflavíkurflugvöllur
Húsavík	Hafnarfjörður.
Seyðisfjörður	

Auk þess nær jöfnun flutningskostnaðar á sementi til eftirtalinna verslunarstaða:

Borgarnes	Hvammstangi
Ólafsvík	Blönduós
Grundarfjörður	Skagaströnd
Stykkishólmur	Sauðárkrókur
Rifshöfn	Hofsós
Patreksfjörður	Ólafsfjörður
Tálknafjörður	Hrisey
Bildudalur	Dalvík
Þingeyri	Svalbarðseyri
Flateyri	Grimsey
Súðavík	Kópasker
Suðureyri	Raufarhöfn
Bolungarvík	Þórshöfn
Hólmavík	Bakkafjörður
Vopnafjörður	Djúpivogur
Borgarfjörður eystri	Höfn í Hornafirði
Egilsstaðir	Vík í Mýrdal
Reyðarfjörður	Hvolsvöllur
Fáskrúðsfjörður	Hella
Stöðvarfjörður	Selfoss
Breiðdalsvík	Þorlákshöfn.

## 3. gr.

Leggja skal flutningsjöfnunargjald á allt sement, sem framleitt er í landinu eða flutt er til landsins. Skulu innlendir framleiðendur (Sementsverksmiðja ríkisins) greiða gjaldið ársfjórðungslega til viðskiptaráðuneytisins, en af innfluttu sementi skal það innheimt með aðflutningsgjöldum. Annast tollstjórinn í Reykjavík og bæjarfógetar annars staðar á landinu innheimtuna og skulu þeir skila gjaldinu til viðskiptaráðuneytisins.

## 4. gr.

Viðskiptaráðuneytið ákveður flutningsjöfnunargjaldið fyrir allt að eitt ár í senn og skal upphæð þess við það miðuð, að tekjur nægi til að greiða eftirtalinn kostnað við flutning frá framleiðslustað eða innflutningshöfn til þeirra verslunarstaða, sem jöfnun flutningskostnaðarins nær til:

## a) Flutningar með skipum:

1. Útskipun.
2. Flutningsgjald.
3. Sjótrygging.
4. Uppskipun.
5. Flutningur frá skipshlið í vöruskemmu.
6. Vörugjald.

## b) Flutningar með bifreiðum:

1. Flutningskostnaður, sem nægi til að greiða rekstrarkostnað bifreiða í þessum flutningum.

## 5. gr.

Tekjur af flutningsjöfnunargjaldi skal leggja í sérstakan sjóð, flutningsjöfnunarsjóð sements. Þeir aðilar, sem gera kröfur á hendur sjóðnum, skulu haga bókhaldi sínu þannig, að fullnægjandi sé með tilliti til flutningskostnaðarjöfnunar.

## 6. gr.

Nú verður tekjuafgangur á flutningsjöfnunarsjóði í árslok, og skal hann þá yfirferast til næsta árs. Ef tekjur sjóðsins eitthvert ár hrökkva ekki fyrir gjöldum skv. 4. gr., skal greiða það, sem á vantar, af fyrstu tekjum sjóðsins næsta ár.

## 7. gr.

Viðskiptaráðherra skipar til 4 ára í senn flutningsjöfnunarsjóði 3 manna stjórn, 1 eftir tilnefningu Sementsverksmiðju ríkisins, 2 án tilnefningar og skal annar þeirra jafnframt vera formaður sjóðstjórnar. Stjórnin skal annast framkvæmd jöfnunar flutningskostnaðar á sementi undir yfirstjórn viðskiptaráðherra, sem jafnframt sker úr ágreiningsatriðum er upp kunna að koma.

## 8. gr.

Stjórn sjóðsins skal ávaxta fé það, sem á hverjum tíma er í sjóðnum, á sérstökum bankareikningi og er hún ábyrg fyrir sjóðnum gagnvart viðskiptaráðuneytinu. Enn fremur skal hún skila ráðuneytinu árlega endurskoðuðu uppgjöri yfir sjóðinn.

## 9. gr.

Stjórn flutningsjöfnunarsjóðs úrskurðar, hvað teljast skuli flutningskostnaður, sbr. 4. gr. Er stjórninni meðal annars heimilt að ákveða, að jöfnun flutningskostnaðar milli tiltekinna verslunarstaða skuli takmörkuð við kostnað af þeim flutningsháttum, sem ódýrastir eru á hverjum tíma. Sömuleiðis skal henni heimilt að synja um greiðslu tiltekins kostnaðar úr sjóðnum að hluta eða að fullu, ef sýnist um að ræða misnotkun á jöfnunarkerfinu í tilteknum viðskiptum.

Heimilt er viðskiptaráðuneytinu að fella niður flutningsjöfnunargjald á sementi, sem flutt er til landsins eða framleitt er innanlands og notað er til byggingar orkuvera eða annarra meiriháttar framkvæmda. Flutningsjöfnunarsjóður greiðir þá ekki flutningskostnað á sementi til þeirra nota.

10. gr.

Kostnaður við stjórn sjóðsins, skrifstofuhald og endurskoðun, greiðist af fé sjóðsins og skal þá tekið tillit til þess við ákvörðun flutningsjöfnunargjaldsins.

11. gr.

Reglugerð þessi er sett samkvæmt lögum nr. 62 30. apríl 1973, um jöfnun flutningskostnaðar á sementi og öðlast þegar gildi.

*Viðskiptaráðuneytið, 1. apríl 1974.*

**Lúðvík Jósepsson.**

*Þórhallur Ásgeirsson.*